


漢書門  
類號  
三八七  
冊架  
四八三

內閣文庫  
漢書  
類號  
三八七  
冊架  
二九四

內閣文庫	
番號	漢 8873
冊數	4 ( 4 )
函號	294 27





蜀碧卷肆

起順治戊子止

仁皇帝康熙二年癸卯

先是崇正中川賊有姚天動黃龍聚黨劫掠巡撫

陳士奇及道臣陳其赤葛徵奇郡守王行儉巴令

王錫營將趙榮貴等設奇夾擊斬賊一千七百有

奇。生擒渠魁馬超一斗麻代天王等二十餘人。賊

奔脫他徙。而沔縣人袁韜因姦嬖事發逃投響馬

賊馬潮呼九思等繼踵姚黃日事掠殺及獻入。遂

丹溪士彭遵泗磬泉編述

淺草文庫



乘勢據蓬州儀隴南部各地方。殺老幼。擄精壯。掘墓開墳。生死無得免者。數年間。烏合愈衆。分為十二大隊。時歲飢。賊以人為食。順治二年。我巡撫李國英大破諸賊於遂寧之曠虛垠。九思潮等走死。韜以殘卒數百奔川東。歸焚一蘄。

○諸賊或稱四家。或稱十三家。袁韜武大定及夔州譚文譚詣譚和巫山劉體純豐城胡朋道金城姚五川施州衛王光興皆甚著。其王有進景果勒張

顯劉惟靈白蛟龍楊炳英李世傑等。莫可稽考。總所謂十三家賊也。

又獻忠未敗。李自成之衆。先潰出關。袁宗第賀珍之徒。偕郝搖旗李本榮黨守素李永亨等。約結十三家。出入巴渠巫峽間。則所謂西山寇也。

又各州縣亂民。號土暴子。以打衙壺為名。凡胥吏之有聲者。糾衆擒之。或投之水。或畀諸火。甚則磔食其肉。官司束手。無可如何。而一時紳士家。豪奴



悍傑。戕滅其主。起而相應。深山大谷中。監寨柵。標旗幟。攻劫鄉里。以人為糧。其惡殆與戲等。其時川南川北。畏土暴子。甚於流賊也。

戊子

順治五年。

明孽尚分據蜀。

○蜀大饑。人相食。○先是丙戌丁亥。連歲游饑。至是彌甚。赤地千里。糲米一斗。價二十金。蕎麥一斗。價七八金。久之亦無賣者。蒿芹木葉。取食殆盡。時有裹珍珠二升。易一麪。不得而殆。有持數百金。買一

飽不得而死。於是人皆相食。道路餓殍。剝取殆盡。無所得。父子兄弟夫妻。轉相賊殺。其食人之法。亦有如下羹羊。饒把火。和骨爛等名目。雞肋篇所載云云也。

○外王父遯菴先生云。往時避寇山中。經過一茅屋。突烟騰起。疑為居人。直入。見釜中所煮。皆人手掌腿足等物。駭愕失聲。時幸主者出外。不然難免。



○家老僕云。宅外里許。有餓死於道者。某某謀夜定剝之。至則止存一頭。先為人所攫矣。余兒時見親故中老叟數人。目黃如蠟。詢之。皆啖人肝所致者。

○眉州民有陳大五。劉尚等居城南外五里。賀家橋。有李三樹。熟而不取。計以誑行人。使之竊李。掩擒殺食。前後所食甚衆。庚寅年事定。被害民陳玉春首於官。捕大五等斬之。民始安枕。

○其時瘟疫流行。有大頭瘟。頭發腫赤。大幾如斗。有馬眼睛。雙眸黃大。森然挺露。有馬蹄瘟。自膝至脛。青腫如一。狀似馬蹄。三病中者不救。

○又鬼魅白晝出見。與人爭道。夜則聚於室中。噪聒不休。其名夢魂魔者。人方就枕。隱隱有物攝魂去。傍有覺者。疾呼可活。少頃難救。抹臉魔者。黃昏時。面皮自脫。若剝削然。不知所之。二物來時。形影模糊。死者甚衆。蓋殺叔之餘也。○故老云。夢



魂魔可以趕逐。而抹臉魔必明火震鼓以守之。最難防備。

○又遭亂既久。城中雜樹。菁菁成林。人家遺犬。食賊所殺人肉。多鋸牙。若猛獸。羣聚為寨。利刃不能攻。為害滋甚。又多虎豹。形如魍魎。饕餮然。穿屋顛。踰城樓而下。搜其人。必重傷斃。即棄去。不盡食也。白晝入城市。遺民數十家。日報為虎所害。有經數日。而一縣之人俱盡殘者。

○諸將相攻。○時全川未附。諸將據地自擅。故巡撫

李乾德者。少遇異人授天書。善占驗。諸將中。惟許表。韜武大定。韜故姚黃餘孽。大定則小紅狼別部也。乾德欲與就功。結二人為心腹。先是李占春部將董子金有萬縣湖灘之戰。韜亦返關入佛圖關。規重慶為己功。長至大會。韜自以位高踞李上。占春不平。心惡之。乾德又陰為構難。占春遂並惡乾德。乾德夜坐船屋。仰視星氣。咄咄謂。今夕主急兵。徒少走匿岷谷。頃之。占春襲表不克。搜乾德船。無



所得。取其孥以為質。韜聞乾德亡。大哭。既迎至。甚喜。占春是日亦歸其孥。表武遂居重慶。占春駐涪州之西平壩。四面阻水。結萬將營。賓客多歸之。于大海壁忠州花陵河。與李唇齒。遵義守將王祥忌于李之盛。而又欲為好於表也。詐請占春。議事。伏兵執之。軍中守者懈。占春踰垣出。殺追者。一日夜歸其壩上營。祥尋與韜而相責望。而楊展亦與祥有隙。遣子璟新攻之。璟新先襲殺馬應試。與祥戰。

敗歸。因是諸將相惡。

○表韜武大定歸楊展。○表武久駐重慶。士卒飢。李乾德遣人說展與合兵。因其餉。展喜。納之。摺為兄弟。從韜也。捷為大定也。青神厚給其貲。共犄角以防賊。

巳  
順治六年。○是歲明孽相圖。賊復自滇入蜀。

○朱容藩自稱楚世子。建行臺於夔州。稱制拜封。○時楊喬然已進總督。范文光巡撫川南。呂大器以



大學士來督師皆惡容藩共謀誅之。

○李乾德使降賊袁韜武大定刺楊展○李占春素與展善展以銀萬兩米萬石餽之袁武不說乾德怨展遇已簡略陰勸袁武圖展三人合謀會展壽詭稱介置宴於特為請之展坦然不疑以一僮隨往既至三人益為恭謹叠相酬勸展連飛數十觥大醉昇之密室令力士刺之○展起家武科以進士第三人及第智勇冠諸將獻賊深畏之川西東

之起兵者倚為長城既死人心解體士無固志矣是時已進爵華陽伯。

○袁韜武大定圍嘉定三月陷之○袁武賺殺展以兵圍嘉定展子璟新力拒之三城月陷璟新以親丁三百騎逃出其妻陳氏指袁武罵曰爾等窮來依我我先人處以縣邑資以多財何負於爾廼圖我家真喪心犬彘也袁武殺之悉併展之貲與衆乾德遂勸袁武保據嘉定○璟新宗正壬午武舉展長子



○時州生員帥正邦母馮氏守寡有姿表武強迫入贅馮氏舉簪自刺死。

李占春間展被害率兵為展報仇不勝而歸曹勳與展刎頸交時亦默然而阻樊一蘄投書責乾德曰嘉陵峨眉間二三遺民不與獻忠之難者揚將軍力也且背施忘好而取人杯酒之間天下其謂我何乾德笑以為救時大計詎監儒所能知耶然蜀紳士無不切齒乾德者。

初王應熊既沒兵部尚書呂大器奉永明王命來川至涪州與將軍李占春深相結楊展及于大海胡雲鳳表韜武大定譚和譚詣譚文以下皆受約束大器因歷遍諸鎮謂監軍道陳計長曰楊展志大而疎表韜武大定恣而好殺王祥庸懦不足仗事尚可為乎後忽於石砭司夜遁走黔之獨山州鬱鬱疽發背卒。

庚寅 順治七年

賊與明孽 各分據蜀

蜀書

卷四



蜀書 卷四  
○朱容藩敗死滎陽。○容藩據夔府自稱天下兵馬副元帥。呂大器檄李占春于大海討之。容藩窘。延北依二譚兵以攻石砦。占春來援。容藩兵敗走死滎陽。

○秋九月。孫可望復遣兵圍蜀。○可望在滇。聞袁韜武大定賊害。楊展將圖蜀。迺上書永明王。為展訟冤。使王自奇將兵向川南。而別遣劉文秀白文選取遵義。

○劉文秀攻王祥於烏江。祥敗自刎死。○文秀文選等以兵至烏江。王祥力戰不勝。自刎死。文秀降其衆二十萬。盡收遵義地。初獻入蜀。畏祥不敢窺遵義。前後拒守。凡八年。至是敗死。聞者惜之。時已晉爵碁江伯。

○劉文秀渡金沙江攻建昌。原任長沙知縣高明死之。○文秀遣別將盧名臣取重慶而已。引兵渡金沙江攻建昌。高明集士民拒於焦家屯。賊兵勢衆。



力不敵歎曰我受朝廷官豈可從賊乎遂盡室自焚死。

○劉文秀攻臨越雋。○寇攻城指揮王自敏妻周氏知不免謂所親唐氏曰前後等死耳他日恐其遲也遂挽唐氏閤室自焚同時王氏俞氏宋氏唐氏俱赴火死皆受聘於人而未嫁者。

○劉文秀攻黎州土千戶馬亭李華宇等戰死。○初亭華宇及楊起泰等佐馬京破賊於龍觀川賊敗

去沈黎不被寇者數年京卒亭輩為千戶文秀至竭力拒守被執不屈死華宇苦戰為賊擒副之時年八十四指揮丁應選亦以年老亡於陣前共起兵富庄姜黃李奈蔡包張七姓子弟頭人俱戰死無一降者。○起泰亦先以老病卒。

○劉文秀攻臨滎經知縣黃儒死之。○儒福建舉人城陷巷戰被獲不屈賊磔于縣之開善寺。

○劉文秀襲曹勛於雅州取之。○勛初敗賊於雅州。



保據其境與楊展相聲援。展死，勛勢孤，而劉道貞先以病卒。范文光因惡李乾德，殺展入山，不視事。勛左右無人，文秀突至，出勛不意，取之。

○劉文秀屯兵于天生城。○城在洪雅花溪口。賊至，踞之。時余飛單騎出覘，為賊所圍，力殺十數人，死陣中。

○辛順治八年。○明孽與賊尚分據蜀。

○文秀大敗袁韜，武大定於嘉定降之。○初，王自奇

兵至川南，袁武拒之。及聞文秀至，撤兵還戰，六戰六勝，有輕賊心。俄而文秀以大兵壓其前，自奇從後，泝流尾擊，一戰韜與大定大敗。就擒降於賊。賊遂取嘉定。

李乾德被執，載舟中，不食者數日。屆月波澤，語弟升德曰：「吾父死於獻也，吾不可以再辱。」遂偕升德並閭家人俱赴水死。○乾德殺楊展，蜀人惡之，其死也無稱之者。且曰：「賊復入川，實彼召之。」雖死，



能蔽其辜乎。

○重慶復陷于賊。○文秀既取嘉定，舉兵東下。而前破遵義時，所遣別將盧名臣者，入涪州，李占春逆戰於羣猪寺口，而敗于大海，在忠州。力不支，遂共放舟出夔門，走荆楚，降於

王師。諸將盡散，無一人敢應敵者。譚弘、譚詣、譚文皆降文秀。

壬辰 順治九年。○是歲 征蜀 川南 平

○正月劉文秀復還雲南。○文秀還雲南，令白文選守嘉定，劉鎮國守雅州。

○三月

王師南征下嘉定。○我師至，鎮國、文選俱敗。挾曹勛走，巡撫川南范文光賦詩一章，仰藥死。時安綿道詹天顏兵敗，被執，亦死之。文光，內江舉人。先官南京戶部員外。天顏，龍巖人。起家選貢生。先是，師至眉州，向成功有衆五千據守石佛棧。



大兵攻之破其柵成功中流矢死眉州平。

○秋九月樊一蘅卒。○一蘅初以戶兵二部尚書加

太子太傅督諸文武恢復全川及諸將相攻令多

不行而袁武殺楊展王祥敗死烏江列鎮兵多散

所保惟叙州一郡不得志遂謝事居山中再聞范

文光詹天顏朱化龍相繼死憂鬱遘疾卒

已癸是歲順治十年。○破賊川北平。

王師大破賊劉文秀於保寧。○文秀及白文選率兵來

攻大兵奮擊破其象陣文秀等大敗遁去。

王師平蜀。○自甲午以後蜀地漸歸版圖而諸賊之負

固者猶出入重夔巴峽間及順治十六年己亥譚

和譚詣共殺譚文文安之率劉體仁袁宗第李來

亨等十六營由水道襲重慶聞之欲討和詣二人

懼率所部來降未幾

大兵取重慶叙州馬湖等屬時三郡為賊將盧名臣

所據我梅勒章京葛朝忠總兵陳德楊正泰水



陸並進攻破佛圖關直抵賊巢擒斬無數降年勝  
赦而用之獻逆孽之擾蜀者盡矣。

○初闖賊餘孽李赤心竄死廣西南寧間其子來亨  
代領其衆走川東分據川湖間耕田自給而先潰  
出關之郝搖旗名永忠袁宗第及劉二虎等共依結

之時獻黨雖盡永忠等尚據巴東康熙元年壬寅  
冬十二月我總督李國英奉

旨統秦豫廣三省兵將會四川進剿師駐萬縣賊棄夔州

國英兵至夔道路榛莽伐山開徑以入二年癸卯  
元日進奪羊耳山宗第遁入深箐我師屯七里  
壩宗第屯茶園坪山勢陡絕諸將攀藤而上宗第  
敗走巴東大兵追及巫山遂據其城衆議移守  
夔門督師計巫山地勢卑狹雖馳驟不便可利固  
守於是深溝堅壘具炮石城下樹梅花椿椿外挑  
品字坑賊至不得進又於城外高處立敵樓以防  
偵探具甫脩郝永忠劉體純合數萬衆攻巫山甚



急我兵出戰。體純等敗走。適陝西會剿兵至。陳家坡奪老木空。體純自縊。大兵乘勝追至黃草坪。永忠宗第皆授首。惟李來亨居茅麓山。高險難攻。我兵四面圍之。來亨出入地名通梁。路徑懸絕。我師蒙霧直上。遂奪通梁。來亨力窮勢迫。八月初六日。焚其妻子。自縊。茅麓山破。馬騰雲拓天寶王光興俱納款投誠。至是闢孽之在蜀。所謂西山寇者悉盡。全蜀收入版圖。一統萬世。蜀人始獲享昇平之

福矣。

附記

○江津曹立鄉。府學生也。賊性端方。為鄉里所矜式。煤山之變。公聞之。北向泣血。悲憤成疾。及賊據川。懸偽職。逼勒士紳。公誓死不從。疾劇。戒子恢曰。吾家世受國恩。汝又弱冠登賢書。茲大節攸關之日。失身取義。止爭此子。吾一生自反無愧。可謂得全。爾勉之。為問曰。我此時若存一貪生念。便如烈火



燒身想到守身全節。即入清涼境界。囑畢而逝。

○夾江宿士敏字元魯。崇正丙子。孝廉。賊官至邑。迫之出。佯應之。治裝赴省。至千佛崖。策馬投江。賊信其已死。不復問。已而潛過江岍。乘夜走雅州山中。易姓名。以節終。

○宋文翼字怒飛。丹稜人。以應貢入國學。授蜀藩長史。甲申。巡撫陳士奇。巡按劉之渤。重其才。授以監軍事。及獻破成都。歸隱深山。不出。

○郝益旋川西舉人。嘗起兵復雅州。復與邛州劉道貞合兵攻邛。不克。退守沈黎。後不知所終。

○汪光翰字文卿。婺源人。竟陵胡恒官川南道。光翰為幕客。獻兵至邛。恒命光翰出調兵。并檄寧越守備楊起泰將兵援邛。未至而城陷。與其子士驊戰死。關門百口遇害。惟士驊妻朱氏洎幼子。殺生得脫。匿民間。隨士驊母舅陳君美者。轉徙榮經縣。降賊武大定。駐嘉定。聞朱氏有殊色。劫致之。朱汚面



毀容以免。堅操撫孤。光翰間關彛裸中。得朱氏母  
子所在。事之甚謹。值劍南大饑。斗米十金。光翰不  
避刀俎。多方保護之。母子廼得全。自是或服賈。或  
課蒙。或為僧。獲稍贏餘。以給饘粥。廿餘年不倦。朱  
教子極嚴。我生亦讀書。知自奮。能文章矣。蜀平。狹  
路通。光翰廼躬送朱氏母子歸竟陵。於是楚蜀莫  
不高朱之節。誦光翰之義。以為忠臣孝子之報云。  
○又有鍾之綬者。字楷士。亦竟陵人。從胡公入蜀。

遊我眉。遂不歸。聞胡公父子殉義。廼自瓦屋山至  
滎經。與光翰同撫孤兒。歷八年所。入滇。至昆陽。死。  
○王承祖。劍州御史梁之棟僕也。獻據蜀之棟子田  
壁。知不免。止一五歲兒。名繩武。召承祖夫婦。屬之  
曰。一綫之脉。盡寄於汝。其善保之。梁氏一家俱遇  
害。承祖負繩武及己子。走賊。追及。棄己子。而匿繩  
武巖穴中。得脫。後土賊起。知繩武所在。欲率其貲。  
承祖負之。乞食山中。及賊息。始出。承祖為之耕耘。



婚娶。延師教訓。至本朝庚子舉於鄉。

○曹椿明末名士也。獻逆後奉永明王命來宰夾江。其時四野蕭條。烟戶鮮少。椿至招流亡。撫餘燼。又急收士人。以時訓課。嘗見城外大明寺。考錄儒童詩云。高樓野望影蕭蕭。盡日無僧伴寂寥。寺號大明。知一統。梁題萬歷紀先朝。治軍久已霜生鬢。謀士猶然劍繫腰。濁酒一杯聊自適。平原芳草倍魂銷。時縣署燬於賊。故於此試士。公所作有鷓血集。

皆亡國之音云。

○李甲湖廣蒲圻人。由舉人知雙流縣。崇正甲申。委署建昌。監理廳。至崇經。值賊犯雅安。義師戰潰。甲隨師奔走。力竭死。一僕守甲喪數年。楚路通。始載以歸。

○富順盧元卿字調元。天啟丁卯解元。累官陝西寧夏道。關賊陷秦。托迹黃冠。潛遁秦嶺間。自題云。生平志氣凌霄漢。自許惟憑忠孝心。家國陸沉身板。



蕩空拋血泪寄兒孫。葬於隴。徽人慕義祀之。

○雷雨津字起劍井研人。崇正甲戌進士官兵部。嘗

過楚題洞庭廟云。我是人龍君亦龍。吾今胡為乎

泥中。憑君借得青駝雨。手攬風雲滿太空。甲申從

張公玉皆監軍死。○其子廷後知吳江縣。

○李俊英南部人。府學生。姚黃賊掠南部。俊英泣涕

擔衆起兵。旬日得千人。禦賊江岬。屢戰俱捷。賊不

敢南。日久糧匱。其弟泣告曰。我等冒矢石。城中人

相繼遁去。無援矣。曷暫退。俊英叱之曰。寧為君父

死。不為一身生。自是毋敢言退者。賊計窘。將引還

會。同事有忌俊英者。噪而南奔。賊得從下游渡。圍

之數重。俊英奮勇突圍。多殺傷。不得出。還至江岬。

投水死。

○劉養貞大邑人。以進士任湖廣漢陽府推官。陞部

郎。闖賊犯都。懷宗崩國。養貞為持服。蚤暮悲號。不

輟。食貧邸舍。以賣卜為生。人呼為劉孝子。病終於



燕京。

哀蜀藩

天社星隳古社壇。杜鵑聲盡石苔癩。井花清冷無人汲。留得丹心萬古寒。張象華

邊徼錫封憐少子。蜀王臺殿獨崔嵬。誰從輦路鳴鞭過。猶記宣門拜刺來。智井寒泉沉鳳羽。天堦白日走龍媒。短墻桃李家家發。畫角聲中杜宇哀。一陸海塵飛井絡昏。錦城茅屋半江村。遺宮日落牛羊

過。野市人稀虎豹蹲。檀樹冥冥香徑遠。海棠馥馥翠雲繁。摩訶但有支機石。尚共銅駝卧草根。呂潛

○萬歷末年。民間好葉子戲。圖宋時山東羣盜宋江。姓名於牌而鬪之。至崇正時。大盛。法以百貫活減為盛負。曰鬪。曰獻。曰大順。其後皆驗云。

○崇正十七年正月。銅仁連界掘出古碑。有字三行。云。東也流。西也流。流到天南有盡頭。張也敗。李也敗。敗出一箇好世界。或以為武侯所遺云。



○彭瑋字子白永川人崇正時以進士為給事中闖入京脅降不從自刎死。

○顧鏞號青城成都人崇正時進士為給事中闖入自刎未絕復被執毒拷罵賊死。

楊展傳

彭遵泗

前明總兵晉華陽伯楊展者字玉樑嘉定人也長七尺有咫性倜儻負文武姿尤工騎射少應童子試參政廖大亨一見器之曰此將材也亟獎拔之舉崇正己卯武科北上挾強弓大矢驅一衛獨行遇賊刼其橐展笑曰爾欲利吾有耶吾與爾鬪射約退百步外執號箭為的吾射不中聽汝取之賊如言一發破其幹賊驚拜去臨試闖貴人有馬允悍難制挽以鐵韉



現猛狀活

號於庭曰。能騎者予第。衆愕踏。鮮應。展持弓矢。排衆突前。奪馬騰躍而上。縱送回旋。九發矢。九中。走馬揚聲曰。四川楊展也。閩貴駭服。展名遂震京師。於是成進士第三人。授遊擊將軍。時秦寇方熾。朝廷深重武臣。尋陞展參將。以憂家居。值蜀亂。鄉盜縱橫。嘗與族子踏月江邊。隔岼影見人行。諦視曰。此賊也。射之。應弦而斃。覘其人。果素掠鄉里者。人以是畏服之。甲申。獻逆據成都。僭號改元。遣偽將四畧。展起兵捷為

一句案

提綱

會閣部王應熊檄至。即從總督樊一蘊。及遊擊馬應試。余朝宗等。攻敘州。力戰復其城。走偽都督張化龍。又擊敗馮雙禮。遂次第收嘉眉諸邑。於是黎州指揮曹勳。副使范文光。起洪雅。土司馬京。起營經。為展聲援。遺民潰卒多歸之。衆至數萬。時獻賊遣狄三品。劉文秀等來侵。大敗還。授總兵。歲饒。人相食。展遣使告。釋黔楚。自紳士以下。至弟子員。皆給資。農民予牛種。使擇地而耕。願從戎者補伍。百工雜流。各以藝就養。

方見作  
用



提撥道

孤貧無告者廩之。又置竹筏數千於同河以濟柴威  
 富之避難者。俾居思經瓦屋諸山。而令其子璟新屯  
 田於峨眉。歲獲粟數千。蜀南賴之。獻忠念展盡取故  
 地。又怒川人之不服已也。大殺成都居民。率眾百萬。  
 菽江而下。展起兵逆之。戰於彭山。分左右翼衝拒。而  
 別遣小舸載火器以攻賊舟。兵交風大作。賊舟火。展  
 身先士卒。殪前鋒數人。賊崩敗反走。江口兩岬逼仄。  
 前後數千艘。首尾相啣。驟不能退。風烈火猛。勢若燎

聲析江  
 河勢奔  
 雷電叙  
 戰大手  
 準

原。展急登岬。促攻。鎗銃弩矢百道俱發。賊舟盡焚。士  
 卒糜爛幾盡。所掠金玉珠寶。及銀鞘數千百。悉沉水  
 底。獻從別道逃免。旋奔川北。展追至漢州。封其屍。而  
 還。是時展威名大振。蜀之起兵拒賊者。皆倚為長城。  
 表韜武大定者。窮困來奔。韜故姚黃十三家賊。而大  
 定則小紅狼別部也。展愛其勇。推心任之。命大定守  
 青神。韜守捷。為鼎足。備賊偏沅。巡撫李乾德初以總  
 制來蜀。獨許表武深相結。至是。韜與總兵李占春相



前乘  
馬射賊  
數條相  
映亦相  
法廻

惡。展素厚占春。時通餽遺。韜不悅。乾德因說韜殺展。大定亦忌展富。三人合謀。請展詣提介。展壽。展欲往。其子環新諫曰。近觀二人。意殊怨望。須察之。不聽。及出。乘所愛白馬。回齧其衣者三。展厲聲曰。吾不懼。獻忠。豈惧他人耶。蓋展破賊多。自矜。又過任人。而乾德以展遇已簡略。夜日德韜除展。不悟。佩劍携一僮。扁舟南下。袁武迎之。偽為恭謹者。展坦然入帳。浮大卮痛飲。日暮沉醉。袁武將展劍昇入別室。使勇士往

刺之。展寐後。目不交睫。晴光炯炯射人。操刀者至。不敢動。展僮云。無畏也。遂縛展。覺知有變。佯呼曰。酒渴甚。予我水飲。僮止之。遂過害。展素精五行遁術。得水可免其死也。實僮促之云。時年四十有五。順治己丑歲。華陽伯。則破獻時。永明王所晉爵勅也。袁武既殺展。引兵圍嘉定。三月。破其城。環新逃去。妻陳氏罵賊死。其家殘焉。時偽帥孫可望者。方據滇。聞展死。使王自竒將兵向川南。而別遣劉文秀等。渡金沙江。取曹



勒筆峭

勲而襲其後。袁武方拒自奇。聞之。還與文秀戰。大敗。俱降賊。乾德赴水死。賊再據蜀。初督師應熊。以賊襲殺平蜀侯曾英。走畢節死。兵部尚書呂大器自柳州至。永明王即命代之。大器遍歷諸鎮。太息謂參軍陳計長曰。楊展志大而踈。袁韜武大定。忍而好殺。王祥庸懦不足仗。蜀事尚可為乎。然自展死後。諸將解體。賊復入。無敢抗者。於是烽火蹂躪。又十餘年而後定。至今談展事者。猶追念喟息。稱楊侯不衰云。

尾音令人嗚咽

贊中暗

包函傳

亦從史

漢來

史氏丹溪生曰。泗王父王吾公。少適嘉定。與楊侯公子環新交。公子兄事王父。及難作。孤身來歸。袁武踪跡亦至。王父可授公子策。貽駿馬遣之。而身詣賊首。告以故。復令人道。道追公子。至新津。公子先渡江。斬舟人。沉船於水。賊遙望不得渡。以故公子免。而余家亦無所害。余因識楊侯事甚詳。觀其經理流亡。與其所以殺敵致果。洵乎文武兼才也。而取人杯酒。自壞長城。西充之罪。庸可逭乎。公子之去也。投誠我師。授

蜀書

卷四

傳四



參將。後復父仇。擅殺落職。家居十餘年。以壽終。

○楊侯存亡實關西蜀。此傳不徒作也。其排場比次。直追班馬。陳范諸公。不免以詞氣累其體矣。固是史才。蔡修萊跋。

劉道貞傳

彭遵泗

劉道貞字墨仙。天啟辛酉。孝廉也。其族世居黎州。指揮。獨道貞家臨邛。為邛人。以文學顯。初時州有登科者。建牌坊。虐使其鄉。又簡富民入戶。歲收牌烟。課名曰免差。官不能難。沿為紳例。里中苦之。至道貞盡謝去。曰。吾忍以一科累梓桑哉。州人高其德。道貞敦行古直。其學六經外。百氏內典。無所不窺。尤刻意兵家言。崇正甲申。獻逆踞成都。遣兵四出。道貞語子膠

便有作  
用非迂  
儒



度曰。邛州控制黎雅建昌。為川南門戶。沿邊土司。可  
 聯以守。惜猝不及備耳。未幾偽叅將張略地至邛。道  
 貞策殺之。棄家走沈黎。激勵土漢李衛等共抗賊。而  
 身自資軍於曹勳。曹勳者。亦黎州世叅指揮也。先奉  
 調守成都。軍於門。賊入。止焉。同輩皆斬。次及勳。勳遽  
 呼奮起。絕其縛。還奪行刑者刀。殺數人。溷江中。脫亡。  
 至是起師洪雅。道貞之去邛也。賊帥狄三品王復臣  
 再至。巡道胡恒檄寧越都司楊起恭入援。未至而城

高勳英  
 勇可畏

破。恒及州牧徐孔徒死之。賊趨陷雅州。循江下攻。洪  
 雅勳率眾保拒小關山。山去邑西南四十里。連崗嶺  
 峒。中一徑。藜石錯雜。賊至。得不過。盡驅騎兵薄隘口。道  
 貞時以李衛軍來。謀遣睽度等。由山右伏行渡青衣  
 江。轉巖賊後。賊陣動。曹勳自上望之。挺刃趣賊。力斬  
 數十騎。貞援枹鼓以從。賊返走。騎兵闕塞。睽度等自  
 下揮短刀仰面疾攻。絕其徑。賊眾數千。悉墮糜斬中。  
 復臣等踐死人窟。匿深箐。以免。賊入蜀後。所至摧陷。

叙戰功  
 處錯落  
 雄勁



田映有  
波折

此段極  
似左氏

無敢撓者。至是始畏蜀人。又以勲前絕縛殺行刑者  
 亡也。益憚之。號曰曹軍。而目道貞西人口語伯溫先生云。於是  
 道貞曰。寇胆喪矣。乘此追亡。臨邛可復也。令睽度引  
 軍疾馳逐賊。而西川舉人郝益旋新起師復雅。斬偽  
 牧。合而之東。圍邛數日。幾克。會賊大帥劉文秀以重  
 兵至。勢不敵。退歸。天全六番招討使高克禮楊之銘  
 者。向氏構怨。高款於獻。銘弟僑欲乘亂弑兄。與高合  
 而銘方連成都進士朱倅伊川壯舉人鄭廷爵兵共

討賊。僑先導賊至。敗銘等於飛仙關。虜殺之。雅州牧  
 王國臣以城降。州復陷。道貞時駐黎城。料土兵募壯  
 勇。謀進取策。聞之。憤懣嘔血。卧疾不起。泣語勲曰。吾  
 以一書生。破家討賊。意借公忠勇之氣。報朝廷三百  
 年養士之恩。今若此。死有餘恨矣。願公勉力。無隳前  
 功。丙戌春正月。道貞卒於黎城。公為人。廉幹縝密。時  
 四方師起。羽檄交馳。外應內謀。事無留滯。又番漢把  
 目等戰歸。自出金帛醴酒曲勞之。人爭為用。嚴道以



北住

補出一

豕忠烈

蜀書

卷四

傳三

南。二年不罹寇害者。公佐勲之力也。初走沈黎。妻王氏率家屬避西山。賊搜執之。及睽度圍邛。環刀械頸置城上。令招其子。夫人罵賊不從。賊怒磔其屍。置之城外。舉家百口殉焉。後一年睽度單軍遇賊。同孟旋力戰以死。其妻馮氏有詩名。載邛乘。

史氏丹溪生曰。儒者習稱道德。恥談兵。臨難縮縮無所施之。以其術為世詬病。先生用一旅師。拒險出奇。摧破巨寇。智勇之略。豈不以其學與。或謂先生喜逃。

禪芥視死生禍福。范仲聞之誅曰。討仇終有恨。學佛竟無成。嗚呼。此其所以為先生乎。余至臨邛。訪其軼事。竊嘆忠臣孝子義夫烈婦。劉氏之門備矣。皎皎乎潛水味山。永終古也。

○墨似大節。吾蜀士夫有不能盡知者。曲為傳出。一門忠烈。炳炳烺烺。百世下令人感慨嗚咽。昌黎所云發潛德之幽光者。此也。凡儀一

蜀書

卷四



鐵脚板傳附向成功

彭遵泗

鐵脚板者眉之鄙民也。姓陳名登皞。生有胆識。膂力過人。家貧。獵獸自給。常赤足。逐鹿豕。奔新斬叢竹中。里許。而足不傷。人目之曰。此鐵脚板也。登皞曰。呼我甚當。以是足不著履。行滕止及脛。終身如常。獻賊據成都。遣偽將狄三品等略眉。先期傳示云。除城盡剽。民不悟。携老幼入城。乙酉正月五日。賊驅城中人。至原田上。盡殺之。又搜戮四鄉居民。登皞突起忿言曰。

九字畫  
出



殘忍二  
字草野  
春秋

洗頸待死。與抗賊殺死。等死。奈何袖手待盡耶。遂裂  
白衣為旗。招各山亡命少壯。大書於上曰。敢與殘忍  
流賊張獻忠為敵者。從我數日內。不期而集者千人。  
登皞持獵械。負柴弓竹矢。赤足先趨。千人者各執白  
楛。相隨據城西醴泉河。斬木列柵。標所書白旗於前。  
名曰鐵勝。鐵勝者。取已勝賊之義也。遂與賊持。前後  
殺獲甚眾。賊大懼。取道潛移東館。登皞又令民兵數  
百。具羊酒。偽為投順者。迎賊帥。賊納之營中。夜舉登

皞率眾大至。鳴金鼓。火攻賊營。數百人從中噪而應  
之。內外夾擊。賊眾大亂。死者不可計數。延遁去。於是  
眉之多月鎮斑竹王二郎壩諸村。各聚眾自守。皆名  
其營為鐵勝。賊聞之。不敢逼。而鐵脚板之名。大播南  
川。嘉定向成功。亦起師拒賊者。有眾五千。欲節轄登  
皞。不從。率兵圍之甘溪口。登皞勢弱不敵。力戰死之。  
眉之人。賴登皞之庇。思其功。皆稱鐵脚板也。成功既  
殺登皞。駐兵石佛站。修木城。鑿壕塹。招集三萬餘人。

既  
拖尾感



朝

抑揚伸縮頗似腐遷

分五營四哨。抗拒官兵。丁亥三月二十八日。我肅王以大兵至。攻破木城。成功中流矢死。其黨延平史氏丹溪生曰。陳登皞不忍桑梓之難。冒萬死。杼公忿。跡其所為。一方之廣涉也。向成功可謂頑民矣。其殺登皞。意何為乎。毋亦好上人。忘利害。延其鄉之風氣然與。

○白衣一書。足褫賊魄。而布置殺賊。何智與胆俱也。古云。亂世多才。信然。蔡修菴

余飛傳

彭遵泗

以地利起史家變體

洪雅西四十里。有鄉曰花溪。背枕飛仙閣。其前大小關山。屏峙溪口。其外限以青衣江。江濤洶湧。急不能渡。其地土泉肥衍。其人饒財穀。重去其鄉。殆天所設以衛養居民者也。甲申。獻賊至。土人余飛聚眾。詢之曰。賊來。生子死乎。曰死。順賊。滌乎辱乎。曰辱。逃可免乎。曰不敢。知曰。如是。飛策決矣。飛觀吾鄉。地險而穀足。無匪人竄伏其間。計惟以死抗賊耳。眾曰。惟命。蓋

蜀碧

卷四

傳一



統是兵法絕無  
鄉人行徑

飛勇健。以俠義稱。言出。人莫敢違也。飛利牲瀝酒。誓  
衆於神曰。我等與賊。義不面會。有一人從賊者。殺其  
人。有一家順賊者。誅其家。誓畢。戶抽壯勇。年二十及  
四十者。得數千人。塞阨保險。造刀仗。烏銃。疊大石。數  
十藜。藜繫長繩。備飛擊之用。賊至。飛選勇士。伏左右  
山谷中。山崗遍樹旗幟。又決大堰之水。灌田。而自以  
羸弱。迎敵溪口。其時賊氣甚銳。目無飛。戰方合。飛即  
陽誌。賊追逐入溪。左右伏發。翼而擊之。飛反戈衝突。

活形  
躍

賊大敗。顧望山間旗。疑不敢上。沿田蹊走。徑狹。騎步  
蜂擁。陷田中。不能出。擒斬二千人。其遁者。為烏銃飛  
石所斃。又過半。賊氣沮喪。遠徙去。飛退賊後。益修險  
阨。寇來則戰。去則耕。如是者二年。其後偽撫南劉文  
秀。駐兵天生城。飛單騎出覘。被圍。不能脫。力斬十數  
人。死陣中。飛死。衆遵其法。團營自保。時越險擾賊。得  
賊謀。輒殺之。賊終不能加。至今居民。猶勝國時土著  
云。

著



○飛指言凜凜有烈士風而設奇殺敵動合機宜  
吳公差強人意隱隱一敵國也蔡修萊

書周鼎昌殺賊事

彭遵泗

獻逆據蜀之三年丙戌春正月偽撫南劉文秀率兵  
十萬由丹稜洪雅入夾江欲搜西山諸路并剿峨眉  
督師王應熊聞之授周鼎昌副將給卒千餘俾間道  
援鄉井鼎昌者夾江南安鎮人也比至賊壁青衣江  
連營三十里警斥堠構浮橋去南安一望矣鼎昌急  
監棚剗大木為炮隔岫飛擊賊塘斃賊人馬甚衆又  
編亂草為筏筏狀如篋筮大數圍鬍髯散漫而隆突

描擬畫  
致飛動  
有神

昌



其頂頂中空。旁貫以繩。擇善溷百人。人與一筏。佩鈎  
腰鐮。截首空中。繫繩於臂。入水。筏浮其上。人伏其底。  
遠望如敗草飄流。不疑有人也。近浮橋。百人者。齊用  
鐮截絡。而以鈎分橋梁。橋解。守橋者盡溺。賊覺。急射  
之。矢格於草。不能入。餘兵判為兩岍。其浮入西岍者。  
鼎昌促圍攻之。斬獲無遺。賊不得志。奔還南安。賴以  
全活。邑之來避難者。千有餘家。

○草筏破浮橋甚怪。其形容情狀。真如目睹。寫生  
手也。蔡修萊


後叙

余覽東林沈雲祚傳後。稱獻逆殘蜀。由風俗之惡。天  
降大罰。嗟乎。何言之悖也。自古亂蜀者。非蜀人。昔賢  
論之詳矣。初賊起秦中。延及晉。及豫。及楚。及大江之  
南北。十年之間。朱殷萬里。婦稚幾盡。彼豈其風俗之  
醇。而天道無知。使為善者獲禍。與明自熹宗不君。逆  
璫煽虐。天心厭之。懷宗不務行寬大。收人心。而先後  
用溫體仁。周延儒。楊嗣昌等。為之內外。鼓賊勢。坐大



往余

土崩瓦解。以底於亡。嗚呼。上實名我。民則何罪。而謂蜀俗惡。受罰何與。當蜀之陷也。士大夫湛。冒粉首。寢戈復仇者。纍纍矣。而內之婦人女子。聯袂自沉。外之士司編氓。倡義討罪。將毋風俗之惡。而猶有是與。余故採其遺事。表而出之。使世之覽者。知降此鞠誼。非關人事。毋令吾蜀獨蒙惡聲也。



文獻堂



